

ANT TORRAU A OBERRI IS UFÌTZIUS DE LÌNGUA SARDA

SERVÌTZIU LINGUÌSTICU IN IS BIBLIOTECAS



Gràtzias a su progetu "Sighendi a Atobiai e a Contai su Sulcis"

intregau a s'assòtziu culturali **Sa Bèrtula Antiga** de Biddaramosa, ant torrau a oberri is sportellus de lingua sarda. Su progetu dd'ant bòfui is amministradoris de su **Comunu de Teulada** (cabutruma) impari a is comunus de Arresi, Tratalias, Santadi, Giba, Masainas, Nuxis e Sa Baronìa - Villaperùciu, e est finantziau cunforma a sa L. 482/99 e a sa L.R. 22/18, annualidadi 2024. Dònna cida, fintzas a mesi de idas chi benit, eis a agatai in is bibliotecas un'operadori chi est a disponimentu de tzitadinus, assòtzius e siendas po fai consulèntzias, bortaduras, e atividadi de promotzioni e avaloramentu de sa lingua sarda. Su progetu prevedit fintzas cursus de lingua sarda, presentadas de librus e àteras atividadis culturalis.

S'obietivu pritzipali est a contai is logus nostrus atobiendi sa genti chi ddoi bivit, duncas baxi a connosci s'operatori opuru mandei una mail a **uls-sulcis@tiscali.it** e ponei "avatu" (seguì) a sa pàgina **Facebook "Sportellu Lingua Sarda Sulcitanu"** po abarraì agiornaus a pitzus de totu is atividadis.

SIGHENDI A ATOBIAI E A CONTAI SU SULCIS

Progetu finantziau cunformas a sa L. 482/99 e a sa L. R. 22/18 annualidadi 2024

Sportellu lingua sarda Oràrius de arricimentu

Teulada	martis	11:30 - 12:30
Santadi	lunis	16:00 - 17:00
Tratalias	martis	17:00 - 18:00
Masainas	giòbia	17:00 - 18:00
Arresi	martis	17:00 - 18:00
Nuxis	mèrcuris	17:00 - 18:00
Giba	martis	11:00 - 12:00
Sa Baronìa	martis	15:30 - 16:30

In is bibliotecas comunalis

Comunus de Teulada (cabutruma), Arresi, Sa Baronìa-Villaperùciu, Santadi, Nuxis, Giba, Masainas, Tratalias.

NUXIS

UNA PASSILLADA A SU TUTONI DE SU TIPO PO ARREGORDAI A SARBADORI CADEDDU


Su 25 de abrili su **Sistema Museali de Santadi**, cun sa collaboratzioni de su **Speleo Club de Nuxis**, at cuncordau una passillada a Su Tipu po arregordai a **Sarbadori Cadeddu**, abogau de Casteddu chi est stètiu protagonista de sa chi in sa stòria est arregordada che sa "**Congiura di Palabanda**". Duncas partia de su medau de Tatinu, una truma de genti, firmendi-sì tretu-

tretu est arribada a Su Tutoni de Su Tipu, ascurtendi su contu de Sarbadori Cadeddu, cunsiderau che unu tramasseri chi fiat aprontendi una furriada contras a su governu piemontesu in su 1812, e chi po unus cantu mesis innantis de ddu cassai e cundennai a morti, iat agatau amparu pròpiu in is montis e in sartus sulcitanus gràtzias a amigus teuladesus. Oi stòricus medas..

sighit a pàg. 2

MASAINAS

S'est cunfirmada che eventù gastrònomicu prus de importu de su Sulcis sa **Sagra de sa Canciofa** de Masainas chi ocannu est arribada a sa de 22 editzionis, chi iat giai otentu, su mesi passau, su riconoscimentu de sagra de cualidadi de s'UNPLI (s'assòtziu natzionali de is Pro Loco). Ocannu dd'ant antitzipada a su 5 e a su 6 de abrili ca sinuncas ferriat in is diis de Pasca, (costumant a dda fài faci a su 25) ma at otentu a su pròpiu unu resurtau mannu meda. Infatis is sòtzius de sa Pro Loco ant serbiu a mesa prus de 1000 personas: genti meda no at agatau logu in pratza Belvedere e at papau in is paradas o in is agriturismus de zona. Prenus puru is treneddus turisticus chi ant fatu su giru de su sartu, s'est biu unu bellu pillu de genti (fintzas turistas de continenti e stràngius) chi at partitzipau a is eventus collateralis: unu cunvegnu a pitzus de sa biodiversidadi che aina po su sviluppu sustenibili, esibitziunis folkloristicas, cuntzertus a su noti e unu spetàculu de showcooking chi at biu protagonistas 3 chef steddaus.



IS ATIVIDADIS DE PASCA MANNA DE SU SISTEMA MUSEALI SANTADESU

Su **Sistema Museali de Santadi** at aprontau laboratòrius bellus chi ant tentu sutzessu mannu meda in antis de Pasca Manna. Infatis cenàbara 18 de abrili 40 piciocheddus, pratzius in duus turnus, ghiaus de su personali spertu de su museu etnogràficu **Sa Domu Antiga**, ant fatu cocois e pipias cun s'ou respetendi sa traditzioni sarda prus sintzilla. Invècias su 19 de arbili a meigama una truma de pipius pratzius in 4 scuadras in s'àrea archeològica de **Pani Lòriga** ant fatu unu giogu de orìgini tedesca: ant dèpiu circai is ous cuaus in mesu de is àndalas, de is tupas e in is mureddas. Duncas funt stètias duas diis de spàssiu mannu po is prus piticus chi ant tocau cun is manus insoru is traditzionis de Pasca e arrespirau ària càrriga de stòria antiga.

GIBA

Su 7 de abrili sa truma de **Marevivo** cun s'agiudu pretziau de su Comunu ant apariciu una giorronada in **Portu Botis** po arrigolli s'àliga impari a pipius e maistas de sa scola elementari S. Domenico Savio. Una bellu mengianu de soli e spàssiu utilosu po fai a cumprendi cantu siat de importu su riciclu e su respetu de sa terra aundi biveus.



Su pani cuendi in su forru de **Sa Domu Antiga** e **Su Tutoni de Su Tipu**



Is piciocheddus gibàius cun sa delegazione de Marevivo in **Portu Botis** e sa Sagra de sa Canciofa de Masainas. Foto Facebook de **Comune di Giba e Villarios** e **Sindaco di Masainas**

ARRESI

Fundus comunitàrius

Su 29 de abrili s'Amministratzioni Comunali impari a sa Confesercenti at fatu unu atòbiu interessanti meda a pitzus de is fundus de su **JTF** chi podit rapresentai un' oportunitadi de crèscida po totus is siendas piticas e mesanas chi traballant in su territòriu Sulcis.

SA BARONIA PROGETU DE EDUCATZIONI STRADALI

Su 10 de abrili passau in Sa Baronia ant fatu sa de tres editzionis de su progetu de educatzioni stradali dedicau a is pipius de sa scola primària e de s'asilu. Bòfiu de is amministradoris e incarrerau de s'agenti de sa **Polizia Municipali Maria Di Leonora**, con sa collaboratzionis de is maistas de is iscolas localis.

Is pipius ant fatu giogus de ruolu chi teniant sa punna de imparai is arrègulas printzipalis po andai in siguresa a pei e a bicireta in is stradas urbanas. Satisfatzioni manna de babbus e mammas, maistus e utentis.

NUXIS

sighit de pàg. 1

... gràtzias a is documentus agataus pagus annus a coa, cunsiderant is fatus de Palabanda prus che una tenta de furriada, una repressioni violenta e preventiva ordinada de una monarchia dèbili chi fiat arrischendi de sparessi de su totu.

TRATALIAS

Billetus de sa loteria po sa festa

Fintzas a su 2 de **l'àmpadas** si podint comporai is billetus de sa loteria po sa festa in onori de **Santa Maria de Monserrat**, Reina de su Sulcis. Funt 20 is prèmius garantius, e is billetus si podint comporai scriendi unu messàgiu a sa pàgina Facebook de su Comunu, cuntatendi su Comitau o diretamenti in is bangus de sa festa.



REGIONE AUTÒNOMA DE SARDIGNA
REGIONE AUTONOMA DELLA SARDEGNA

